

S'engascha era fitg per las vischnancas

Il nov president dal cussegl dals chantuns

■ **(anr) Il nov president dal cussegl dals chantuns, Hannes Germann, dal chantun Schaffusa, è dapi 2008 parsura da la Associaziun da las vischnancas svizras. Avant era el stà davent da 1997 president communal dad Opferts-hofen nua ch'el abitescha anc oz.** Sco president da l'Associaziun numnada s'engascha el fitg per l'autonomia, fermas vischnancas e per lur dretg da concedisiun sin divers champs politics. (In da ses antecessurs a la testa da l'Associaziun da vischnancas svizras è stà a. cuss. naz. *Toni Cantieni* da 1987–1995.)

Pir da curt ha *Hannes Germann* inoltrà in postulat per intervegnir tge effect che l'artitgel 50 da la constituziun federala haja. Quest artitgel davart citads e vischnancas, ì en vigur 2000, garante-scha l'autonomia communal segund il dretg chantunal, mo oblihescha era la confederaziun da resguardar en ses agir l'effect per las vischnancas e da prender il duaivel resguard sin la situaziun da las vischnancas, citads, aglomeraziuns e territoris da muntogna.

Tar l'evoluziun duai vegnir intercurri schebain las spetgas da l'artitgel 50 sajan vegnidadas ademplidas e s'effectuadas sin las decisiuns politics. Era duajan ins constatar nua che meglieraziuns sajan pussaivlas. – Il cussegl federal ha dal reminent proponì da curt d'acceptar quest postulat.

Schaffusa – anc mai gi in cusseglier federal

Chapaivel che l'Associaziun da las vischnancas svizras ha gi – sco ella communitescha en ses bulletin – grond pla-

schair che ses president, Hannes Germann, è per in onn a la testa dal cussegl dals stans. Il chantun Schaffusa, il pli en il nord da la Svizra, n'è – sco ins ha pudì leger quels dis – propi betg vegnì disà bain ils davos decennis cun presidis a Berna.

I va 40 onns enavos nua ch'il liberal Kurt Bächtold ha presidià il cussegl dals chantuns e schizunt 52 onns (1961) che cuss. naz. Walter Bringolf è stà sco il pli aut Svizzer a la testa dal cussegl naziunal. Lezza tscherna era stada ina recumpensaziun ch'el aveva bain candidà uffizialmain 1959 – l'onn da l'introducziun da la «formula magica» – sco socialdemocrat per il cussegl federal. Pervi da ses passà communistic n'è el betg vegnì elegì en la suprema executiva federala. En ses stagl èsi stà cuss. fed. Hans-Peter Tschudi, da Basilea. Fin oz n'ha il chantun da Schaffusa – cun ses pli che 70 000 abitants – anc mai gi in cusseglier federal, ina «sort» ch'el parta anc cun ils chantuns d'Uri, Sviz, Sutsilvania e Giura.

Hannes Germann, president dal cussegl dals stans, era bain vegnì nominà 2008 e 2011 da sia partida chantunala (pps) sco candidat per il cussegl federal e fiss era stà elegibel per ina gronda part dal parlament. Mo gia entaifer la fracziun da la pps a Berna ha el gi zunt naginas schanzas.

Il cussegl dals chantuns è vegnì presidià fin ussa sis giadas da Schaffusians, il cussegl naziunal quatter giadas. Quest chantun n'è davaira mai vegnì disà bain cun presidis en las supremas autoritads federalas a Berna.